

14 AUG 1996
Menem-Lawat
PRESIDEN ARGENTINA LAWAT MALAYSIA

KUALA LUMPUR, 14 Ogos (Bernama) -- Presiden Argentina Dr Carlos Saul Menem akan tiba di sini pada 22 Ogos ini untuk lawatan negara selama tiga hari ke Malaysia atas jemputan Yang di-Pertuan Agong Tuanku Ja'afar.

Presiden itu akan diiringi anak perempuannya, Zulema Maria Eva, Menteri Luar Dr Guido di Tella, pegawai-pegawai kanan kerajaan dan wakil terkemuka sektor swasta.

Menurut kenyataan Wisma Putra yang dikeluarkan di sini hari ini, lawatan Presiden Menem dijangka mengukuhkan lagi hubungan mesra dan erat antara Malaysia dan Argentina dan terutama dalam meningkatkan kerjasama ekonomi dan perdagangan dua hala.

Presiden Menem akan menghadap Tuanku Ja'afar dan menghadiri jamuan negara. Presiden Argentina itu akan juga mengadakan perbincangan dengan Perdana Menteri Datuk Seri Dr Mahathir Mohamad mengenai isu-isu dua hala dan antarabangsa.

Malaysia dan Argentina akan menandatangani satu perjanjian perkhidmatan udara dan memorandum persefahaman (MoU) mengenai kerjasama dalam bidang pelancongan.

Satu perjanjian usahasama dan MoU antara sektor swasta kedua-dua negara juga dijadual ditandatangani.

Presiden Menem akan dianugerahkan ijazah kehormat Kedoktoran Undang-Undang oleh Universiti Kebangsaan Malaysia (UKM) pada satu majlis konvokesyen khas.

Beliau juga akan menutup satu seminar perniagaan anjuran bersama Dewan Perniagaan dan Industri Kebangsaan Malaysia, Persatuan Selatan-Selatan Malaysia dan Kedutaan Argentina.

-- BERNAMA
SJA AKD